

24072  
-6

原序

讀文章而有情知其忠孝人也自左徒美人香草而後後之忠孝之士若杜工部李供奉蘇端明黃涪州辛制置之屬或托於詩歌或見於詩餘小令體裁不同此物此志爾故文章之道最尊上自謨訓疏奏箋表之類降而至於詩餘小令何異公侯五等之尊下視輿臺皂隸之賤也哉若夫宣其忠孝懇悃不得已而安之若命之心則疏奏箋表猶之冠冕黼黻之尊且華而詩餘小令猶之中裙單絞之賤且褻也夫其

服愈媠去體愈親其服愈賤其被愈廣此詩餘小令  
之作雖褻且賤而其製有不可廢耳孫子愷似所稱  
忠孝家兒也其祖中丞公自請纓開闢終身不忘爲  
國喪元之志而其下褊裨廝養皆能以其材伎勇健  
樹勲名而建大業宜乎愷似之心益悲以深益壯以  
婉淒以切折而出於詩餘小令之作如羌之笛聞之  
砧令聞者讀者爲之黯然而銷魂悲哉而奪氣也士  
生菰蘆中讀書養志有所懷抱不得托之賈疏董策  
以稍申其痛哭流涕之情其所遇又多舊國舊都瀕

洞風塵之感宜其顛倒爛熳自托於滛哀曼怨而不  
辭其要歸於搖人之心動人之骨而彼亦不暇自知  
之而不知者方以謂近於婦人女子之音而傷學士  
大夫之概何異不痛者視痛者之呻而怪之也哉箕  
子曰欲哭不可欲泣謂其近於婦人夫天下微言要  
道高而及之聖人則每每至於嚴冷無言而止而夏  
之日冬之夜桃之灼灼柳之依依以及死生契濶異  
室同穴之情必至於婦人而後能極其學士大夫之  
所不暇言不能言者雖聖人以爲不及而亦不可棄

也愷似嘗為余言柳永周邦彥非詞之至者予深然  
之夫周柳烏知聖賢忠孝之大者邪知之則不奉填  
詞之敕不入師師之牀下矣錢唐同學弟吳秋題

往余在都下謁松坪先生於古藤書屋首問作詞之  
法先生教以當學樂笑翁因舉只有空山近來無杜  
宇歎為文外獨絕并述樂笑警句奇對與陸輔之詞  
旨互相發明余退而讀樂笑詞其源似出於淮海清  
真而旁及於玉局青兕後則變化於白石梅溪竹屋  
迨與同時之夢窗花翁草窗碧山日湖二隱山村學  
舟薰習最久清空騷雅直可與白石並驅不獨得音  
律之學於楊守齋徐南溪也及取先生之詞讀之其  
別花餘事則絕似東山東堂小山淮海其梅泚詞則

又旁及於青兕而變化於樂笑其清空騷雅駸駸乎  
可追樂笑矣余三十年前從先生案頭鈔得梅泚詞  
藏之篋衍今先生外孫程說巖謀與余付之剗剗命  
予序之予學詞五十年毫無進步讀梅泚詞深有愧  
於師門之緒言也受業樓儼百拜

秋左堂集卷一

別花餘事

嘉定孫致彌愷似填

滿江紅

金治文四十初度

春到花朝漸九陌煙光似綺看嘯傲東山安石年華  
如此四十功名輕杖節三千賓客爭投履羨隱囊塵  
尾擅風流神仙侶 琉璃匣銀鈎字珊瑚架金荃製  
借酒兵澆盡胸中硯礪廣廈萬間歡杜老汪陂千頃  
思顏子笑當年不免為蒼生徵書起

蝶戀花

送春

九十春光歸太遽畢竟人間有箇春歸處忍淚問春  
春欲語春歸即在愁來路 春去愁來無計度打點  
心情索性隨春去訴與春光春亦許無端又被愁留  
住

滿江紅

漫弔敬和岳忠武王韻

清淺蓬萊揚塵處五雲消歇歎一霎崩濤鼎沸罡風  
猛烈金翅餐龍頻劈海玉蟾騎兔還吞月向九關叩  
額幾時通丹心切 木石恨何年雪樓臺影須臾滅  
歎囊中七寶難修月缺幾處霞沉龍虎氣千秋碧湧

蛟螭血白虹飛魂繞舊仙山金銀闕

浣溪紗

花底相逢一笑狂冰綃如水玉肌涼銀塘名字愛鴛  
鴦 譜就偷聲教弄玉傳將小像刻沉香一春贏得  
費思量

滿江紅

夏日過箕野即事賦贈

綵筆烏衣羨早歲休文聲價點綴些隱囊塵尾風流  
如画景滌芳蘭仍馥郁宗之玉樹何瀟灑喜清心相  
映皎冰壺渾忘夏 揮毫畢彈棋罷竹几旁湘簾下

想紅牙顧曲周郎流亞臺上瓊簫吹引鳳陌頭珠勒  
看盤馬待他年八詠繼東陽凌顏謝

鵲橋仙

七夕次張西又韻

瓊牕月瘦銀河波淺慵把春山黛掃多情多感爲聰  
明願還却天孫餘巧 金壺漏促璇宮夢短一霎佳  
期過了天孫若是巧偏多看夜夜渡河須早

前調

代

哭花情緒破瓜年紀多少閒愁未掃尋思無計可消  
除只索向天孫乞巧 命薄於花愁濃於酒悔殺小

時了了傷春纔罷又悲秋也只爲鍾情太早

前調

代

歷歷榆星溶溶桂月誰把瓊樓重掃經年纔得一相  
逢應反向人間乞巧 夢爲愁縈歡因別減絮語臨  
風未了不如淪謫在黃塵羨繡閣合歡

早

浣溪紗

綃帳寒輕麝腦濃銀床冰簟玉肌融守宮多事褪春  
紅 憐我病餘添護惜殢人嬌處小惺忪驚疑渾似  
夢魂中

前調

次韻和余澹心徵君五十自壽四闋

白髮平頭五十人

原倡起用白香山句

金門大隱是前身雷車

閒棹婉衿嗔

紫府餐霞勝白墮紅泉泛屐笑玄真

碧桃花下又千春

前調

白髮平頭五十人忘機魚鳥亦相親生花才子司

去呼

花神

此日扁舟依茂苑何年雙劍合延津東山絲

竹小經綸

前調

白髮平頭五十人魚龍蹤跡避風塵麻姑書信往來

頻盧女門前芳草合臯家橋畔落花春頑仙文伯

醉鄉民

前調

白髮平頭五十人一生詩酒見天真湖山隨地寄閒

身天上琪葩仙種貴月中瓊樹艷歌新名花頃刻

酒逡巡

菩薩蠻

芙蓉浥露銀牀冷月華涼浸真珠影夜夜夜深時花

間頻夢伊 夢來留不住 夢去無尋處 憶夢不成眠  
蛩霜泣曉天

浣溪紗

碧慮屏深月幌新 蘭膏猶旁枕函聞 玉簫聲斷奈何  
人 好夢未成眠未穩 最難消遣是黃昏 從他薄倖  
也消魂

前調

紅浪濃香鵲尾薰 碧虛清影月鈎分 關心無那意中  
人 才合眼時先入夢 細思量處暗銷魂 梅花小帳

喚真真

滿江紅

用曹顧菴學士湖上倡和韻送徐子慎之廣陵謁雷侍御同大年作

花月春江曾放棹 碧流初漲 憑問訊紅闌 橋畔簫聲  
無恙 玉樹新聲 緜月下瓊花 別種移天上 想樊川小  
杜艷情多 誰堪餉 垂楊岸 蘭舟漾 梅花解 蘭箋唱  
羨追陪 柱史笑 傾家釀 寄遠漫題青玉案 登臨共倚  
紅藤杖 記平山 山色有無中 今何狀

蘇幕遮

玉蟲消金鴨 冷雲幙沉沉 隔斷嫦娥影 莫道書生還

薄倖中酒悲秋併做相思病  
翠衾單銀漏永悄喚  
卿卿少箇人兒應信是書生真薄命好夢無端也被  
風吹醒

醉春風

酒後有寄

繡榻花香細銀荷燈穗墜壁人密坐泥金卮醉醉醉  
纖手親携低聲細勸恁生不醉閒却鴛鴦被費盡  
珍珠淚瑣牕明月悄窺人睡睡睡衣上香濃枕前寒  
峭恁生得睡

醉花陰

小閣燈青微雨後紅影輕寒透寶枕夢難成酒醒香  
消依舊愁時候無端翠瑣雙眉皺淚染芙蓉繡人  
靜瑣窗寒兩箇傷春一樣相思瘦

玉蝴蝶

秋柳

一夕金風吹遍蕭蕭楚楚葉葉絲絲目斷煙消灞岸  
月冷隋堤點寒鴉孤邨流水送社燕遠樹斜暉繫相  
思疎砧翠幌怨笛金微休題有人惆悵一番搖落  
多少淒其夢斷魂銷多情多感慢題詩峭風霜禁持  
此日好鶯花辜負當時譜新詞莫將憔悴說與春知

蝶戀花 謹夢

密約難從花下訂，夢裏相逢，料得卿須肯。不道夢中還薄命，卿來我去，渾無定。卿夢未來，我夢等我，夢來時，又恐卿還醒。安得蘅蕪香一餅，相携踏盡，梨雲影。

千秋歲

題畫壽佟漕白中丞

溪山窈窕，黍谷春光好。泉石潤，煙雲繞。千重嵐翠合，一道松風曉。高臥處，只愁又是鸞書到。蕭相功成早，整頓乾坤了。過幾度，中書考。東山安石伎，洛社耆

英老人共醉年年春色瀛洲島

點絳脣

旅中苦雨

倩酒消愁，醉鄉却有愁先住。不如歸去，免得愁相遇。縱使歸家，不是無愁處。偏相妒。瀟瀟風雨，慣把歸期誤。

望江南

次沈箕野韻

人去也，春好畫圖中。金屈戌，流花影，月玉闌。干殢柳絲風，鶯囀謝娘慵。

前調

人去也簫局峭寒新簾外春光簾下淚惜花人似夢  
中人怎地不傷春

前調

人去也芳草畫樓前拾得沈郎腸斷句送行人淚落  
花天春恨又今年

前調

人去也人去夢難留半夜酒醒垂柳岸一聲長笛杏  
花樓樓下水空流

四換頭

同心雙姊妹絮語珠簾內話到合歡時紅潮各自低  
低頭閒自忖此際教儂怎驚喜又驚疑春風到玉

兒

殢人嬌 和張越九仿東堂體

春瑣寒窗紅珠小帳正兩地消魂一樣並蒂蘭花殷  
勤寄餉算今朝已在那人頭上 芳草青迴晴波綠  
漲空夢斷渡頭雙槳朱樓春好休施簾障待柳外花  
陰片時偷望

浣溪紗

艾納熏篝擁被池煖香留倦覺來遲春情無主落花  
時 燈暗愁吟珠錯落笙調恨譜玉參差綠窗明月  
夢如絲

南歌子

同大年鄰園訪舊

青瑣重門掩流蘇小帳遮繁花如繡柳陰斜又是銷  
魂時候到君家 鳳子偷黏粉鸚哥促喚茶盈盈冰  
雪映窗紗不捲水晶簾箔對梅花

歸自謠

風流業多謝朦朧花底月潛身捱到昏鐘歇 珠簾

欸揭心猶怯無多說雙雙含笑吹燈滅

滿庭芳

蛤枕寒輕鵲鑪香煖柳絲深鎖妝樓春醒未醒鸚鵡  
喚梳頭正是海棠睡足扶不起一片春愁雕闌外楊  
花燕子肯爲玉人留 朦朧尋舊夢水晶簾下曾共  
綢繆任豪犀塵滿鬢棗慵收漸老蜂黃蝶粉更何人  
識取風流還自勸休將閒恨蹙損遠山秋

菩薩蠻

賦得綠窗花影

梅花春鎖層層雪瓊窗冷浸娟娟月花月兩徘徊玉

人來不來 屏山歆蛤枕今夜霜華緊無語斷腸時  
月斜花影移

點絳脣

賦得望陌頭楊柳

無限韶光離情只有垂楊綰枝頭風煖一夜黃金軟  
有箇傷春人在深深院珠簾捲闌干倚徧目送飛  
花遠

薄倖

和合肥公韻

娉婷小市試單衫輕黃杏子倚雕闌香肩低拍願做  
今生鄉里最無端幾箇黃昏梅梢柳外春如此縱草

解忘憂花能銷恨又被鶯聲喚起

玳瑁雙棲海燕

怎做得蜂媒蝶使怕帶眼頻移琴心難訴桃花消瘦

菱花裏春光有幾算芳心一寸結成千穗丁香紫桐

花么鳳拚似伯輿情死

南史張彪呼其妻為鄉里

滿江紅

春遊次箕野韻

吳苑春深端不羨桃源梅冶點綴些柳梢酒旆花陰  
舞榭嫩綠池塘爭放檝軟紅泥土看調馬甚續紛蜂  
蝶繞蟬衫黏蘭麝闌干外秋千下圍棋倦吹簫罷  
笑東風桃杏等閒偷嫁璧月慵繙江令曲遠山重昵

張郎畫道釵梁新喜在明朝蛛絲掛

虞美人

青旛半捲花枝動蝶翅酣香重曲闌紅映綠波中又  
是一聲鶯囀落花風 海棠午倦眠初足扶起眉峰  
蹙水晶簾下儘思量獨自倚樓和夢送斜陽

摸魚兒

春暮

問啼鴉干卿何事催他春色遲暮驚迴一枕梨雲夢  
輕逐春光同去無覓處但目斷萋萋芳草濛濛絮留  
春且住又無那黃昏妒花風緊花落不知數 春去

路紫障千重難護多情偏惹愁緒添香重禮旃檀像  
暗祝傷心一語顰眉嫵只願得無情免似多情苦瑤  
臺月午看花影簾前如聞歎息也把斷腸訴

望海潮

和合肥公用宋韻

落紅如雨楊花飛盡春光只剩今宵斜背銅釭半欹  
珠鬢鏡中人影苗條寶袜褪纖腰奈愁偏昵耍醉不  
勝嬌獨倚朱闌紫簫吹斷月明橋 多情慣惹無聊  
記銀箏勘譜瓊笈爭標酒態天斜睡情旖旎魂消昨  
歲花朝青鳥信迢迢望碧城何處弱水何遙一寸相

思捲成千疊小紅蕉

鷓鴣天 和廣平先生

畫裏風流夢裏神明珠爲價璧爲人鴛鴦社煖瓊簫  
夜孔雀屏閒黼帳春 芙蓉袂石榴裙凝情小閣耐  
斜曛東風偷送春消息豆蔻濃香隔幌聞

沁園春

漫興次王阮亭先生韻

小院春晴新桐初引清露晨流歎不律有神塵封五  
簾太阿知我苔繡雙鈎文擬擲金隱須漱石衣被還  
期遍九州空侘傺負前身許掾小字留侯 持螯弟

勸兄酬且消遣雄心大白浮縱胡粉梢頭干卿何事  
唾壺如意謂我何求劔客要離酒徒蔣濟來往須教  
似信鷗傾家釀拚成都市上典鷓鴣裘

前調

我欲避人愚公之谷華子之岡便單絞岑牟世皆欲  
殺虎靴桃杖自謂非狂勝作頑仙當須慧業貞白先  
生眼漸方涼風好且北窗跂脚一枕羲皇 白波墨  
瀋淋浪笑顛顛當年盛孝章漫授簡梁園才非枚馬  
扶筇蔣徑客是求羊扮演天魔插身丑淨竿木隨身

戲一場回頭早只清微洞府元是吾鄉

賀新涼 賦別

柳月窺蘭席對離樽猛然長歎喚聲堪惜脉脉相看  
無一語怨殺萍蓬蹤跡忍辜負花前片刻有幾相逢  
旋送別拚青衫消受紅冰濕且爛醉金釵側 浣花  
箋紙桃花色譜新詞殷勤寄語征途將息夢裏不知  
人去也要問歸期端的又怕鱗鴻難覓明日關山  
今夜酒黯銷魂同並闌干立芳樹暗暮雲碧

玉蝴蝶

舟中讀箕野贈行作次韻奉酬兼寄曉思大年

此夕離情何似飄零飛絮搖漾遊絲回首江城漸遠  
綠柳長堤映疎簾青山倒影迎画舫碧樹斜暉最相  
思詩才謝朓画筆王微 休題無邊客路無窮別淚  
無限淒其酒醒燈昏無慘空檢斷腸詩暖風香棟花  
開也清音暗榕葉濃時寄將離休教別夢遠向天涯

南史王微自言吾性知画  
後人誤為摩詰語非也

念奴嬌

西湖坐雨

小樓如画對瀟瀟暮雨朱闌重倚山翠湖光煙霧外  
西子朝酣未起月棧收燈花橋罷舞淨把鉛華洗何

人解識西湖真色如此 休問桂子荷花興亡多少  
一片空濛裏人與湖山俱是夢贏得閒愁如水蘇小  
墳邊岳王祠畔兒女英雄淚千鍾若下今夕爲君沉  
醉

水調歌頭

登湖心亭

蘭葉隨風去飛閣倚晴空檻外湖光如鏡螺髻繞諸  
峰隱隱紅樓紺宇歷歷雕鞍画舫倒影綠波同拍手  
吹橫玉長嘯一樓風 棟香暖梅雨歇柳陰濃画圖  
遠近不知身在水雲中喚起大蘇蘇小携取金蓮金  
縷同醉水晶宮何似瀟湘曉一片白雲封

漁家傲

香鴨翦濛銀箭永杏煙濕髻梨雲冷春夢如絲飛不  
定誰驚醒水晶簾外芭蕉影 人面如花俱薄命春  
風幾日紅相映一夜落花和雨聽鸞紗靜等閒添上  
相思病

江城子

五月福州道中舟行見柳絮作

多愁生怕絮漫漫到春殘淚頻彈開遍葵榴人過九  
龍灘正是嶺南風土異榕樹暗荔枝丹 驚看晴雪

散炎天帶蠻煙舞風前回首隋堤吳苑一淒然賺我  
傷春前日淚重灑透越羅衫

江城梅花引 榕城飲席

乳蕉花底遇卿卿似多情似無情手撚花球獨自繞  
花行輕拍香肩呼小字偷送眼又斜身倚繡屏 繡  
屏繡屏背銀燈酒漸醒月漸明去也去也撇不下秋  
水盈盈拚得今宵魂夢殢園亭只恐書生緣分薄今  
夜雨滴梧桐夢不成

東風第一枝

丁未試燈日立春效梅溪體何匡  
山少叅坐上賦

柳眼偷窺蘭心暗動珠簾深處寒淺小樓昨夜東風  
綵勝宜春乍剪星橋火樹恰映著黏鷄貼燕喜扶頭  
婪尾初醒幾處燈街影亂 纔逗得春光一點早圓  
了銀蟾一半裁紅暈碧心情明月暗塵庭院酒旗歌  
板把兩樣風光齊占還準備挑菜青鞋過了燒燈消  
遣

吳 鉅典成

後學錢元台彭齡校

戴范雲機又

秋左堂集卷二

梅泚詞上

行香子

嘉定孫致彌愷似填

小小房櫳陣陣東風恨韶華直恁匆匆詩囊画卷茗  
椀誰供有輞川人樊川子玉川翁 花謝樓東人醉  
樓中帶梨雲倦眼朦朧斷腸曲子還與誰同似張三  
影柳三變應三紅

南鄉子

花下小紅橋醉昵朱唇暖玉簫並倚香肩低按拍魂

銷惹得餘香在錦袍 消息又花朝  
麟帶蟬衫總寂寞 寥想得那人春睡起無聊  
羞把腰肢鬪柳條

調笑令

昭華小史十五餘 一生花底花不如  
喬家碧玉妒 不得金篦秋月眠  
氍毹可憐流落吹簫處  
西子湖頭寒食路  
陌上花開緩緩歸  
雙雙携手求仙去  
仙去消魂處  
羊車芳草西泠渡  
鄂君青翰今何許  
綉被春寒暮  
雨相携好向天台住  
並蒂玉桃分與

虞美人

惜花忍見花成陣  
淚眼先偷搵  
玉窗風雨又瀟瀟  
拚得輕魂特地爲花銷  
枝頭百舌無言語也到傷心處  
多情多感易傷春  
願得來生做箇薄情人

浪淘沙

把酒勸飛花  
且住爲佳秋  
千牆院綵繩斜  
畢竟蛛絲留不住  
飛過檐牙  
簾外即天涯  
休掩鸞紗  
春心一點落誰家  
只有綠楊金穗好  
依舊藏鴉

高陽臺

燕剪裁煙鶯梭織雨  
晴絲難綰春光  
又是清明匆匆

蝶粉蜂黃軟簾深掩東風急繫柔腸搖曳垂楊倚闌  
干多少傷情一片斜陽 章臺往事怕思量奈蘅蕪  
好夢還殢紅窗飛盡桃花負他前度劉郎芭蕉漫捲  
心千疊解不開百結丁香最無端花外冰弦錯認求  
凰

百字令

題陳蟄菴三教圖

風塵回首遂初衣瓢笠飄然五岳誰把平生蕭瑟意  
寫入幼輿岩壑便腹耽書撚髭覓句神采清於鶴洛  
生梁父當時心事如昨 只今名列樵陽青厓白鹿

且賣韓康藥投老孤峰圖作佛藤杖蒲團芒屨三十  
年中未來過去遊戲供行樂舉觴一笑麒麟空畫黃  
閣

漁家傲

點點檐花和淚落傷心人聽霜天角打疊思量圖睡  
著難忘却難忘却也難忘却 既是書生緣分薄如  
何花底輕相諾畢竟紅綃虛密約從今莫從今莫也  
從今莫

風流子

次箕野韻為人催妝

玉梅臨繡閣春光好彷彿小羅浮羨並蒂初開花如  
人艷三眠乍起柳似情柔鴛鴦社釵梁留白燕帳額  
隱青牛吹玉秦臺綵鸞頻下傳香賈袖銀鴨旋收  
海棠春睡足靚妝窺鵲鏡雙影嬌羞須信蘭香張碩  
本是仙儔看鬪草扶來粉粘麟帶踏青歸晚紅膩細  
鈎應笑西川眉史枉記牙籌

湘月

疊韻送雁市

秋花夾岸悵西風錦纜乍牽蘭葉怪煞斜陽衰柳外  
攬送吳郎輕別露白江空天高月小柔櫓波聲咽相

尋夢裏画屏山翠重疊

卧聽銀浦流雲芙蓉泣露

金井啼螿切細想樽前歌笑處似隔蕊珠宮闕青雀

飛迴紫騮嘶去須有來時節花間携手紅牙還唱湘

月

滿江紅

寫生次歸元恭韻

磊砢長松笑和嶠森森千丈任道上揶揄羣鬼綵毫  
無恙聲價從他分沈宋英雄未肯齊瑜亮便鳴珂絕  
粒李侯歌吾何讓精廬小須重創醉鄉近時酣暢  
愛紅牙鐵板旗亭爭唱禮法豈知爲我設老莊正可

增其放記鳶肩火色困新豐終騰上

沁園春 寄題沈濤思離垢園

問訊梅梢小堂疎豁水木清華正澡影軒前魚牀碧  
漲凝香榭畔燕壘紅遮罨画溪流蕭閒精舍繡佛長  
齋禮木义春雲渡望平坡笙鶴咫尺煙霞 桐陰竹  
翠交加恰午睡棠梨繞徑斜羨鳳噉鸞啣臺邊嘯詠  
鶯歌蝶拍岩際趺跏蓮泛紅衣藤霏紺雪同野堂鄰  
二仲家應相笑甚年年雙屐辜負梅花

意難忘

次宋荔裳觀察韻寄宛西較書

舉贈瑤華記枇杷門巷初試蟬紗歌喉鶯宛轉酒態  
柳天斜眉暈月臉銷霞腰細楚宮娃苧蘿村比方西  
子没甚爭差 何時重過卿家更綠楊繫馬烏白聽  
鴉仙郎簫共擲狂史鼓頻搗緋艷曲對名花心事訴  
琵琶又何須鑿空博望銀浦乘槎

江南春

洞庭翁季霖屬和倪高士韻

三月吳儂競籃筍傾都遊冶房櫳靜墜粉飄香滿大  
堤綠波人面爭花影藕絲裙妥蟬衫冷臙脂淚染西  
施井濛濛飛絮撲紅巾綠楊香夢迷芳塵 酒旗輕

錫鼓急杏煙低罨梨雲濕花朝幾日清明及醉眼瞢  
騰眩朱碧韶華欲去空於邑柳塘怕倚危闌立天桃  
片片逐流萍酣春鷺燕徒營營

鵲橋仙 七夕次韻

昨宵人去今宵星聚京兆雙螺誰掃天孫離別動經  
年算薄命皆因太巧 思他難睡招他無計央及雕  
籠吉了休隨靈鵲共填河學杜宇催他歸早

鷓鴣天 題別花舊稿

九髻旗亭記往時麝熏春暖玉簫遲紅牙解顧周郎

曲羅扇曾誇小晏詞 拋酒使謝歌兒樊川心事落  
花知秋燈重點香檀拍便恐明朝鬢有絲

虞美人 賦得螻蟻也知春色好倒拖  
花片出宮牆題瓜步女子画

棠梨泣露啼鷺咽一夜霏紅雪多情游蟻惜餘芳不  
似蜂爭粉蕊蝶爭香 玉臺纖手東風裏寫出傷春  
意頻娥想像對飛花多少飄零柳絮不如他

減字木蘭花 馬上和關雎度

垂鞭低鞚玉驄難載春愁重窄袖蟬紗金鐙深藏小  
樣靴 拋鞍忽去目斷綠楊芳草路解事香塵不上

盤鴉兩道雲

前調 車中

春風繡幃微寒小露芙蓉面眉語偷傳玉色郎君墜  
馬鞭 去如流水滿路猶餘香旖旎輕輓輕雷恰似  
柔腸宛轉迴

柳梢青

亞字城西無邊柳色綠蘸清溪幾日春來一番雨過  
數點花飛 新裁白越單衣喜柳標穿林共携載鶴  
船開鬪茶僧去貰酒人歸

蘇幕遮

詠布帳贈大年

竹牀低蒲薦細誰護詩仙安穩秋宵睡憑仗并刀裁  
吉貝六尺柔藍恰稱孫弘被 掩餘香宜薄醉送煖  
留春絕勝梅花紙錦幄羅幃爭得似夢醒松風吟思  
清於水

采桑子

友人有羨歸雁者戲爲賦之

行行白雁春雲外慣惹淒其恁得如伊歲歲逢春便  
得歸 從他過盡君休問欲寄相思畢竟無知不向  
南飛向北飛

前調

阿蓮曾向紅橋見花底清吟月底瑤琴消受春宵一刻金  
歌雲夢雨匆匆散直到而今芳信沉沉却悔  
當初著意深

賀新郎

用辛稼軒憶陳同父韻送徐扶令歸婁

把劍爲君說且揮鞭歸家莫問馬驢王葛白面談兵  
無用處此恨千秋須雪怪卯歲早生華髮好向嵩山  
分玉斧待磨將七寶修明月休漫浪鼓齊瑟更無  
清淚沾離別算從來延津神物雙龍終合秋老江鄉

看負米星沒寒波生骨笑溫嶠衣裾輕絕百斛葡萄  
澆壘塊奈難消一寸臣心鐵髯如戟背皆裂

前調

疊韻寄不菴高士

醉看黃花說想淵明此時爲汝淋漓巾葛地老天荒  
多少淚頻向樽前揮雪歎卅載西臺晞髮且喜秋來  
雲葉淨好酣歌酌取將圓月小海唱湘靈瑟 青山  
對酒清江別記幾番從衡抵掌孫吳都合只怕橋邊  
空進履未是留侯仙骨但些子心腸癡絕人世算來  
無可願願神貌食盡刀兵鐵還煉石補天裂

前調

送陳子萬入都三疊前韻

咄咄從誰說甚年華侵尋誤了黑頭諸葛斑馬一聲  
何處去貂帽蒙戎衝雪望直北青山如髮十丈紅塵  
眯客眼笑經年三踏盧溝月擊筑罷意蕭瑟窮途  
更作窮秋別論我曹中年懷抱非關離合天廐飛龍  
今有幾珍重黃金臺骨莫漫學郇模悲絕爐鞴紛紛  
唯鑄錯問人間誰是錚錚鐵請纓去關繻裂

前調

下第後送楊星源南歸兼寄不菴四疊前韻

毘毘從君說算年來風塵歷盡酸梅寒葛失意人分

啼鶯候那更玉蛾翻雪恰掩映綠楊絲髮芳草喚愁  
花迸淚照離筵偏是團圓月吹竽好漫操瑟鷗波  
釣侶三秋別悵佳人碧天無際暮雲空合卸却蒲帆  
煩傳語無恙昭王臺骨笑泣玉荆人癡絕五木臬盧  
何憑準甚盤龍大叫顏如鐵離樽盡唾壺裂

前調

午日次路湘舞韻送戴蘿軒南歸

共憶江南路羨朝來梅霖初歇斑駁先去笑我渾同  
春絮墜幾度欲飛還住空夢想碧筩消暑杯酒英雄  
閒比並甚而今氣短如兒女看七首寸心許蒲帆

一葉凌秋渚。問誰同龍潭邀月。駕湖聽雨。柳外銀箏  
花底笛。隨分憑君教取。向此際。能相思否。最苦歡場  
攙別恨。聽越吟顛倒。成吳語。愁歷亂。五絲縷。

前調

送周惟念之洮岷幕

燕筑風騷屑。喜相將旗亭賭記。黃河明月。忽漫揮鞭  
行萬里。去逐崆峒旌節。正洮水珠凌初合。舍利裘輕  
蘆酒美。擊黃羊。醉獵鳴沙。雪笳鼓。競烽煙歇。壯游  
自可輕離別。但故人浮沉京雒。素衣塵黥。席帽騎驢  
成何事。冷淡毛錐。生活望隴首。泉聲嗚咽。賸有梅花

堪寄遠。奈難逢驛使。空攀折。相思苦。雁能說。

浣溪紗

山塘送春即事四闋

曲曲朱闌映綠楊。搖搖畫舫近山塘。干人何事斷人  
腸。柳絮風尖花歎息。芹芽泥軟燕商量。爲他憔悴  
爲他忙。

前調

千頃雲邊笑語來。苔痕偷染踏青鞋。相扶紅袖下瑤  
堦。畫扇戲粘蝴蝶粉。花闌賭記牡丹牌。賀他嬉子  
上金釵。

前調

未解相思學避人  
慵開笑口易眉顰  
不知何事不宜春  
稱撥香弦纖指爪  
怯迴珠被小腰身  
賺他寶馬一逡巡

前調

新綠陰中酒旆招  
石場絃管畫樓簫  
留春無計索春饒  
醉倚檀槽調淨婉  
戲拋瑤爨泥櫻桃  
輕魂禁得許多銷

滿庭芳

送徐章仲至單父言別彼此黯然賦以錄別兼訂明春再晤於任城也

雨候愁深月梁夢斷相逢忍即分  
携長堤衰柳策馬漫相隨  
遮莫狂歌雅謔便深盃  
百罰誰辭琴臺畔當年高李曾和杜陵詩  
臨岐渾忘却紅牋覓句共比紅兒  
奈一聲哀雁喚起離思車騎匆匆  
南北悄無言各自淒  
其休辜負南池春早重醉柳如絲

前調

看凌小史舞戲贈次章仲韻

繡幕鐙搖畫屏香煖櫻桃初試新聲  
霜濃月淡何處轉流鶯最愛天斜舞袖  
暗銷魂何必傾城含情處  
春愁無那殘夢牡丹亭  
深更還促坐蟬聯私語微罨

欵纓便淳于一石值得魯騰準擬謫仙樓畔喚羊車  
重醉蘭生又只怕同雲釀雪天也妬多情

洞庭春色

用蔣竹山體贈陸天浥山人

我不讀書不知古人阿誰似之看鴻爪行蹤亦通亦  
介蟬綏活計非惠非夷高比少文癖如元鎮還剩多  
情顧愷癡渾閒事笑玄門橐籥禪子健槌平生僻  
性耽奇莫漫擬前身老畫師愛石鼓殘碑親曾摹拓  
太山絕頂方肯題詩一領田衣三年燕市不受京塵  
半點淄松江岸放煙波釣艇彷彿天隨

前調

丁巳元日同顧從伯客南旺

又把屠蘇荏苒風塵三十六年正望裏雲飛吳淞江  
畔臥來雪擁南旺湖邊春入燒痕河分岡勢臨水登  
高益惘然寒窗下賴同心促膝軟語纏綿無端醉  
拍龍淵算只合歸尋二頃田辦一領羊裘臺前釣月  
一頭黃犢隴上耕煙種菜人閒散花人至共酌匏樽  
酌劔仙從吾好笑新豐客舍火色鳶肩

前調

題邵生小像

若有人兮拍担科頭鶴骨翛然想好句吟安花前自

賞異書鈔得林下重繙羽扇輕搖瓷甌淺酌瀟灑真  
同玉樹看斯人者蓋幼輿巖壑伯仲之間 溪山佳  
處盤旋問誰伴逍遙礪戶邊但綺石新栽蘭香裛露  
龍鱗舊種松老參天冰雪聰明煙霞標格妙手丹青  
與細傳江南好約他年歸去共醉瓜田

多麗

甲寅秋南池送沈覃九兼懷譚左羽朱錫  
鬯徐勝力陸武園次覃九留別原韻

酷相思把臂翻添心惻破征衫對君倦櫓舊遊休問  
羣屐且班荆典衣小飲免華圓莫虛今夕池上籌花  
亭邊挑菜可憐誰譜艷歌昔昔問燕市酒人吟侶蹤

跡夜深述也應向山東念我落魄孤客 趁放牖奔  
流十丈峭帆斜掛三尺好秋光盡歸詩畫鳳唼殘香  
手親滌路轉杉青林添楓紫故人思夢定相覓只愁  
近鷗邊驚斷三弄釣船笛何時許移棹柘湖共醉溪  
側

太常引

聞歌

香檀金縷駐行雲虧殺醉中聞不是醉中聞怎捱這  
迢迢夜分 嬌泥人憐誤邀人顧無計不銷魂若要  
不銷魂除非是吳兒木人

用賈充稱  
夏統語

念奴嬌

丁巳九日汴梁客舍同顧子豐葉武東作次韻

蕭條逆旅這情懷不稱黃花佳節倦馬垂鞭塵撲面  
殘照西風陵闕良岳基荒夷門市冷懷古心空折酒  
酣搔首頓添幾許華髮那更獻賦無媒鯤池浪湧  
欲濟無舟楫濕透征衫雙淚眼忍聽陽關三疊繡譜  
曾傳金針早度好在鴛鴦帖相期努力明年同補明  
月

前調

汴梁道中次子豐韻

不如歸去更誰能虛左夷門迎客濁浪黃塵移浩劫

空想宮雲五色劔孤彈荒雞並舞愁鬢絲堪織崢  
嶸五岳方寸如何平得回首城闕悲笳霜風淒緊  
衰柳遮天碧茅店寒燈披故帙腸斷夢華消息廣武  
猖狂新豐飄泊痛哭無人識村醪雖薄與君且共浮  
白

前調

望梁山灤同子豐戲和舊韻

宣和舊事記流傳稗說幾多豪客誰使英雄悲失路  
空為綠林生色泥馬南奔青羸西走恨不曾相值若  
歸駕馭梁米何須求得即今驚外遙山鷗邊寒水

依舊連天碧  
智井頽垣何處問  
六六雁行消息屠狗  
曾封髡鉗可將  
只要波斯識  
茫茫今古頭鬚  
一夜堪  
白

前調 疊韻有贈

蓮花旋舞有小顰  
能品清謳娛客雪  
態雲容看  
不定  
難辨珮聲釵色  
秋水爲神  
春山如笑  
十斛明珠值  
梁州遍  
徹去也  
怎生留得  
惆悵燭影  
猶紅衣香未歇  
醉眼迷朱碧  
馬滑天寒歸路遠  
好教玉人將息  
柳帶深盟  
櫻桃短夢  
脉脉芳心  
識愁吟誰伴  
銀蟾一暈初

白

水龍吟 題顧從伯小像

道人抱膝悠然  
無人解識  
長吟意林泉  
寄跡溫柔託  
興漫供遊戲  
揮塵清言  
聞鷄狂舞  
聽鶯沉醉  
似櫪羈  
猛馬繚牽  
俊鶻難消  
盡英雄氣  
探徧瑯函  
秘旨更  
諸侯爭先  
擁篲  
依紅泛綠  
至今猶夢  
吳山越水  
子種  
高松雛成大鶴  
歸來活計  
倩虎頭好手  
他年重寫入

香山會

潘陽范公撫浙時  
舊客故有吳山句

齊天樂

鄔翔九故駙馬榮康公裔也同客南陽  
公幕中者五年相得甚歡戊午春于將

北游出其小像  
索題賦此以贈

因依五載如兄弟忘形遮莫爾汝樓憶青蓮池尋杜  
老幾共狂吟醉舞心期互許記說劍燈殘論詩月午  
伊嚶荒雞夜深時傍短牆度 沁園猶剩朱戶羨仙  
史吹簫風流如故朗澈須眉蕭閒巾帔試向畫圖看  
取傳神阿堵待翠壁旁邊松陰深處添上蘭芽幾枝  
春帶雨

水調歌頭

別恨

日落馬行急風剪黑貂裘惆悵紅亭別處忍淚各凝

眸多謝青山無數遮斷離愁來路今夜可無愁薄酒  
醒偏易欹枕數更籌 憶前歡尋好夢又從頭此情  
誰見窺人殘月恰如鈎辜負章臺弱柳懊恨王孫芳  
草腸斷望京樓何日携繡被再共越人舟

臨江仙

家善夫州牧署中同路子復蕭騰九路  
秦封侯大年李伊人雅集即事

官閣中春春正好樽前別樣繁華霓裳小部錦屏遮  
歌聲留月住舞態與雲斜 却愛焚香同宴坐竹爐  
親試新茶紅牋小令笑相誇捲簾招乳燕把酒勸飛  
花 卷簾句善夫新詞把  
酒勸飛花于舊作也

前調 贈劉子竹

名士古來推汝穎更看公幹經奇朱霞白鶴見風規  
屠龍曾淬劍倚馬便題詩 湖海神交心互許喜同  
月樹高枝秋燈蕭寺舞荒鷄期君天下寶休負少年  
時

清平樂 題包山翁養齋課子圖

雲深玉柱羨爾幽棲處瓊樹森森隨杖履閒課花前  
章句 大兒解讀奇書小兒也識之無待取鳳雛鵲  
起共君老作樵漁

沁園春 榜發之次日 午門謝恩京兆賜宴即  
事口占次張貞臣韻

日炫觚稜塵消輦路珠榜初開看北海鵬搏扶搖擊  
水南陽龍起天矯驚雷萬里王程三條官燭有客青  
衫絕域回空自笑漫凌雲獻賦貼月非才 帝城秋  
色佳哉更法酒筵開疊鼓催喜穩稱黃鞋錦袍重賜  
低籠席帽彩勝新裁小字泥金紅箋好語先報高堂  
與玉臺春明近待芙蓉鏡下走馬歸來

前調 疊韻贈李丹壑

紫殿春晴句臚曉唱五色雲開正雛鳳初飛丹山迎

旭潛虬纔躍碧海聞雷玉映清標花生彩筆走馬銅  
街得意回人爭羨有長源仙骨太白仙才 家聲弓  
冶良哉看世掌絲綸後命催喜蓮燈夜半龍香親浥  
花磚日午鸞詔重裁車笠盟深塤篋好叶許我論交  
上吹臺金魚珮倘時能換酒肯惜頻來

漢宮春

贈緯雲用棠村先生送子萬韻

燕市逢君又柳映青帘花黏彩索春衫拚典聊復行  
歌相樂封侯時命漫縈懷問他王朔喚荆高屠沽舊  
侶且向酒壚酬酢 採取別來囊橐但笑看牆角榆

錢淹泊杜鵑聲裏夢繞江南村落魚天碧漲負三年  
撈蝦草屨笑底事騎驢席帽空走高門縣簿

前調

春怨疊韻

裊裊青旛怪無賴東風輕搖鈴索晝長人靜但聽鳥  
烏聲樂雕籠睡穩羨雙雙迷離撲朔謝鏡中多情瘦  
影伴我依依酬酢 塵鎖笙囊繡索恨輕魂易逐柳  
綿飄泊苔錢點點綠遍茶蘼院落春泥鴛印夢難尋  
緗鈎錦屨向此際紅垂玉筋珍重桃花臉薄

解連環

已未秋客長安將歸留別同學諸子次武曾韻

吟殘零雨問淒其西候誰憐孫楚早著破萬里征衫  
笑何事馬蹄不如歸去檢點頭銜依舊署釀王麴部  
趁蕤香膾美綠泛蘭生菊蕊開處 京華昔遊記否  
有幾多同調酒龍詩虎共贈我冠柳新詞似寒露迎  
風滌人袪暑牽惹離思又一似游絲縈絮拚秋袞別  
夢頻飛帝城尺五

前調

疊韻送路湘舞由中州南還

長安今雨倚荒臺極目煙寒平楚忍更向禾黍西風  
倩班馬離鴻伴君歸去樂府新題携一卷補亡南部

過夸門市上訪我酒壚舊醉眠處 重陽故鄉到否  
想登艫詠史依稀素虎漫回首京洛浮沉共荷露招  
涼茗糜逃暑且泛蘋洲任船尾荻花吹絮笑樊川枉  
賦阿房博他第五

前調

秋夜感舊三疊前韻

豆花微雨傍虛牕孤影做成酸楚枉怨悵春帶愁來  
怎解事秋風不吹愁去方響誰家細按徹雲藍小部  
正涼欺瘦骨舊夢未成醉夢騰處 歸舟字能認否  
只燒香汲井分明蟾虎悄記得茉莉香中伴玉漏聲

沉冰肌無暑仙袂蟬紗映淡月輕如綸絮怪嫦娥不  
爲人圓看看四五

前調

歸計已定忽爲敏中刺史請於都尉公邀  
入鍾離郡幕期以明夏復入都門四疊前  
韻示諸

兄弟

剪燈窗雨奈東吳歸計又淹西楚依舊跨短轡長鞦  
趁殘月盧溝唱陽關去路鬼揶揄但碌碌隨人按部  
向鍾離城下宿莽淡煙漢陵荒處休論尚存舌否  
歎秦川漂泊畫難成虎纔受盡破帽西風便準備明  
年絺衣衝暑自笑無端來往似匆匆萍絮問何如驢

背尋詩學他鄭五

花發沁園春

贈同年王梅峰新婚

巷記烏衣人看春柳王郎地望如許袖拂天香纔把  
秦簫吹向鳳樓深處青桐乍乳早結就同心花苒笑  
碧落靈匹年年流雲空限銀浦最是合歡芳樹稱  
鷓鴣雙栖玉漏休曙木瓜漬粉豆蔻熏衫淡泞遠山  
眉嫵麵桃詠絮應和徧香奩佳句更問訊髻影彈琴  
長卿新賦成否

八犯玉交枝

范奇玉招飲張氏園亭予以事阻  
未赴寄此且索補醉

松醞堪携茗牋乍約先夢城南韋曲錦石參差幽徑  
小密樹深藏書屋鷗飛鷺浴更皎鏡秋塘鴨頭新染  
平波綠最稱柳堤狂飲花裊眠熟 良朋勝地此遊  
共判秉燭紅螺浮白相屬擲橫笛聲噴霜竹任燕筑  
吳簫爭逐只無那葭難倚玉翻教歡賞成蕉鹿且補  
賦新詞憑君重罰依金谷

轆轤金井

送許潛壺歸里兼寄同學諸子

叫雲鴻陣向長安催送江南霜信斑馬頻嘶又攬成  
離恨鱸香蓴嫩冠掛了綠蓑眠穩魚蕩波涼蟹胥月

暗菊花開近 燕臺漫論市駿只先生少室價高莫  
問我亦飄零早敝貂金盡故人相訊道秋興霜添潘  
鬢荻岸帆移楓林帘捲歸舟須認

江月晃重山

題東田詞稿

百轉金衣睨皖千絲碧藕玲瓏薛家新樣粉牋紅香  
檀拍親點付蓮鴻 山抹微雲女壻月移花影郎中  
笑他殘酒唱松風清平調題取牡丹叢

丹鳳吟

長安客舍苦熱適得張子西又書有萱  
花棚下喫菱角唱吳歌之約遠想慨然  
用片玉  
韻寄之

長記故園消夏紫對庭軒碧環池閣黃梅雨足染就  
綠陰成幕食單移向竹深荷淨薇露杯香水漿椀薄  
覓句爭題柿葉送盡斜陽新月旋掛樓角 悔煞五  
更起舞惹將別恨長作惡襪襪朱門裏耐炎威灰洞  
金石堪鑠桃笙歸夢繞徧豆花籬落欸乃歌中菱米  
嫩料松枝同握也應念我猶恁漂泊著

明月棹孤舟

題徐電發楓江漁父圖

幽素已從屠釣舉夢猶戀舊垂綸處錦樹霜酣絮花  
風緊曾伴呂郎軟語 儂亦吳淞江尾住愛欸乃綠

蓑細雨乍展新圖頓教鄉思先逐白鷗飛去

如此江山

輯朝鮮采風錄偶成題其後

疏窗展卷涼蛩靜依稀舊遊重省鵠塞沙黃龍堆草  
白青鎖摩天高嶺驪江淥淨趁野渡楊花片帆風正  
果下驕嘶亂松翠拂帽檐影 閒尋太師故井悵金  
麟一去洒巖苔冷碧落孤雲香奩蘭雪幾許好辭投  
贈霜華玉瑩剩淡墨旁行欲斜還整却對秋燈似華

胥夢醒

楊花渡箕子井酒岩皆在朝鮮其先有檀君  
與堯同時乘金麟上昇如中國所傳鼎湖事  
崔孤雲唐進士仙去許蘭雪  
明時閨秀皆有集霜華紙名

八聲甘州

過周還梅虞部寓酣飲達曙追念舊遊慨然有作全錫鬯左羽融谷覃九

衡公

記斜街西畔冶春餘百遍泛觥船正河豚初上山桃  
乍吐醉聽鶉絃一霎書傳白羽叱馭日南天漢節梅  
花外荏苒三年愁絕當時賓客鎮相思目斷瘴雨  
蠻煙喜子卿無恙頭與壁俱還向秋窗深宵剪燭任  
花冠啼徹五更前容易過驚波如海好夢重圓

步蟾宮

陸敬峰寓齋聽陸君暘弟子弦索

檀槽膩滑蛇皮暈稱鹿爪香絃細輓一聲聲作斷腸

聲有幾許彈頭簪搵六宮遺譜從誰問倩紅豆傳

他分扞休教更唱白蘋風怕惹起江南秋恨

曲譜遲其聲以

媚之謂之簪搵君暘考定北曲六宮譜甚詳核

天香

絮惹花魂香迷蝶夢青帘葉葉斜捲雁齒橋橫魚鱗  
波皺草綠裙腰如剪鴛鴦頰白嘶過了垂楊西岸風  
顫鞦韆綵索吹來碧桃千片最憐乳鶯學轉巧相  
和鳳笙鵝管悄記年時挑菜討春游倦纖手曾分團  
月奈一帶紅牆似銀漢目斷殘陽平蕪自遠

偷聲木蘭花

白蘋風緊重陽近一行雁字催霜信錦樹初殘秋夢  
闌時報峭寒獨眠人起聞偏早淺黛愁蛾描未了  
怕有書回簾捲層樓試望來

好事近

過松陵悼山子弘人聞夏元禮諸君子

風緊画眉橋吹皺一湖寒碧載得詩愁多少減楓江  
帆力蘆花半吐雁初飛秋色太明瑟正恁感時懷  
舊更斜陽漁筵

垂絲釣

舟行瀾溪有懷惟念

短篷小艤樵風吹送如葉菰米雲沉菱花波貼天水  
接卞錦鱗撥刺驚鳧唳記旗亭欸洽周郎約我相  
期乘興舟楫紫鱸綠鴨誰解傳書劉漁唱無人答碧  
雲暮合但玉簫自擲

羽仙歌

季仁山職方席上觀劇同張仲垣作

索郎旅語愛新正才破小隊紅牙夜偷過向米家燈  
影下一串珠喉早惹住擘絮春雲千朵情塵消欲  
盡不道今宵便要無情也無那漫形相人間那有舞  
鳳歌鸞除非是画裏海山吹墮七十二仙娥按霓裳

還未抵者番斷腸真箇

摸魚兒

題益都相國萬柳堂用元人圭塘欸乃集韻

買陂塘旋栽楊柳夔龍翻幕隨務廉公萬樹秋煙冷  
重沐東山霖雨鷗泛渚稱退食忘機瀟灑題孤嶼萍  
裊鴨語愛嫩綠陰深軟紅塵遠日涉漸成趣沙隄  
路手筆人看燕許從教年近姜呂白頭才力真強健  
寫遍午橋佳句花釀醕喚蝶拍鶯歌絕勝紅牙譜風  
流今古穀雨菊苗分寒香晚節還待醉秋圃  
詞陵國以柳花為酒見酉陽雜俎

金菊對芙蓉

別茂叔喬瞻兩弟且黼姪

羃歷藤陰扶疎梧下相過便醉醇醪愛兄酬弟勸不  
待招邀林間小阮詩才健共擘牋銅鉢爭敲剪燈聽  
雨攤書映雪幾度良宵念我氎氎無聊看一鞭欸  
段獨向河橋正雲低雁斷風緊蓬飄回頭尺五城南  
路這離懷別樣難消謝池好夢也應隨我飛渡金焦

青玉案

泛舟橫塘作用賀方回韻

十年不踏行春路重載酒尋山去曲曲疎林帆影度  
鷗邊寒水雁邊斜照多少關情處生煙一抹鱸鄉

暮紅葉休題怨秋句青筠綠蕞心久許終須買箇楸  
頭船子醉聽雙橋雨

秋左堂集卷二

外孫壻汪 榆錦峰

後學程宗倓 恬士校

姪孫 烈介繁

